



11. juli 2025

UKA2025/106

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Avanersuarmi inuussutissarsiutinik inerisaanissamut siunertalimmik periusissiorinissamut, ilaatigut qaammarsaassutinik pikkorissaanernillu imaqartussamik UKA2026-mut suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Tunngavilersuut:

Inuussutissarsiornikkut aallartisarneq, namminersortutut alloriarfiit oqimaannerit ilagaat. Oqaatigineqartarpoq ukiut siulliit marluk aallarnisaanermi oqimaannerpaajusartut. Suleruloorneq, inuttullu pilliuteqarneq avaqqunneqarsinnaanngingajapput.

Taamaattorli iluatsikkaangamik inuiaqatigiinnut suliffissaqarnikkut allatigullu tunisilersarput. Ukiuni kingullerni avanersuarmi suliffissaaleqineq, inunnik isumaginninnermut tunngasut allallu eqqartorneqarnerat initusarput. Ajornartorsiutilli ilorraap tungaanut aallartissagutsigit, innuttaasut sulisut qiimasut piumassuseqartullu pilersinnissaat pingaaruteqarpoq.

Aallartisaaneq, aallartisaaneq, aallartisaaneq. Tassa ullutsinni tusaasarput. Aallartisaanermik kulturimik pilersitsiniaraanni inunninngaanneertussaavoq. Illuatungaanili aallartinnissamut ajanneqalaarnissaq aamma pisariaqartarpoq.

Taamaattumik inatsisartut ilaliinissaannik neriuteqarfigaakka. Siusinnerusukkut inatsisartutigit Avanersuarmut immikkut isumaginninnikkut iliuuseqarnissaq ataatsimoorfiusarpoq, aallarnisaanikkullu immikkit iliuuseqarnitsigit ataatsimoorullugu inuussutissarsiorneq aallarluartinneqarnissaanut ikorfartueqataasinnaavugut.

Iliuuseqarnissamut suliarisariaqakkatut isigisavut ilaatigut makkuupput:

- Tunngaviusumik namminersortutut ingerlatsinissamut pisariaqartutigit qulakkeerneqarsimasussat pillugit siunnersuineq piginnaanngorsaanerlu.
- Namminersorlutik ingerlatserusuttut akornanni attaveqatigiittarfissanik pilersitsiniaqataaneq.



- Aningaasalersuinikkut tapersersornissaanut aqutissiuussineq, soorlu namminersortutut aallartisarnermi 'microlånitut' aningaasaliissutigineqarsinnaasut aqutissiuullugit.
- Immikkut inuusuttunut, suliffissaqanngikkallartunut aallarnisaarusuttunullu paasissutissanik aqqissuussamik periarfissalersuineq.
- Kommuni pineqartoq sumiiffimmilu ingerlatsisut qanimut suleqatigalugit pilersaarusiortunilu ingerlatsineq.

Pilersaarut erseqqissumik piffissalersugaasimasariaqartoq isumaqarpugut, aamma ukiuni arlariinni malitseqartittarnissaanut tunngasutigut. Tamanullu atuuppoq, sumiiffimmi pineqartut nukiilu tunngavigalugit atorluarlugillu pilersaarusiorteq ingerlanneqassasoq avaqunneqarsinnaanngimmat.

Inuit aalisatissaanni tunisigit, aalisakkamik ataatsimik tuniinnarnagit, namminneq aningaasarsiorfissarsiornissaminnut aalisarsinnaanngortitsigit.

Taamak oqaaseqarluta aalajangiiffisassatut siunnersuut Inatsisartunut oqaluuserisassanngortipparput, neriulluta aqutissiuueqataanissamut piumassuseqartoqassasoq siunnersuutigineqartutullu suliaqartoqarnissaanut Inatsisartut tunuliaqutseeqataassasut.

Pisortanut aningaasatigut allaffissornikkullu kingunerisassai:

Naatsorsuutigineqarpoq siunnersuut piviusunngortinniarlugu allaffissornikkut piareersaassuteqarluni ukioq ataaseq AC fuldmægtigitut sulisoqassasoq, nalilimmik 500.000 kronit. Tamatuma kingorna siunnersortinik pisariaqartitsisoqassaaq, siunnersuutip uani killiffiani aningaasatigut suli nalileruminaatsinneqartumik. Naatsorsuutigaarput pilersaarusiorternerup ingerlanneqalernerata kingorna pisariaqartinneqartut erseqqinnerulerumaartut, tamakkulu pillugit Naalakkersuisut Inatsisartunut ilisimatitsisarumaartut pisariaqartutigullu aningaasaliissutissanik ujartuisarumaartut naatsorsuutigaarput.

Namminersortunut aningaasatigut allaffissornikkullu kingunerisassai:

Naatsorsuutigineqarpoq, siunnersuut iluatsittumik ingerlassappat, namminersortut amerlanerulissasut. Tamatuma saniatigut taakkununga aningaasatigut allaffissornikkullu siunnersuut kinguneqassanganneqanngilaq.

Innuttaasunut aningaasatigut allaffissornikkullu kingunerisassai:

Innuttaasunut aningaasatigut allaffissornikkullu kingunissat pisortanut kingunissaattulli inissisimassanganneqarput.